

Hóben Mishonero

Revista pa Yunan di Pastor - Union Karibe Hulandes -Promé semèster 2021



Señal di **Stòp** pa Embahadornan Yòn
Daniel, Embahador Ehemplar



Revista **HÓBEN MISHONERO** ta un reto i invitashon pa nos muchanan i hóbennan yu di pastor por ta yená ku Spiritu Santu for di edat yòn, pa nan tambe ta bosero pa Dios, unda ku nan ta, unda ku nan bai, siguiendo stapnan di nan Maestro Kristu Hesus.



Historia pa Mucha

Pùzelnan pa Traha

Plachi pa Klùr

Duna Ideanan pa e Revista

P.S.: Tur artíkulo ku no tin nòmber ta kontribushon di editor



Entre nos:

Ser un embahador, den tempunan antaño, i tambe awor, ta un puesto sagrado i di hopi respèt den tur país.

E ta un persona maduro, un hende responsabel, un hende ku bo por dependé riba dje. Un persona ku tin karisma i takto den su forma di ser. E no ta biba pa loko, e no ta bula papia pa loko, un hende ku no ta rabia i zundra, muchu ménos, papia palabranan ku no ta nèchi. Di kon nò?

Pasobra e sa ku e ta un persona speshal, e no ta ken-ku-ta. E ta representante di su país, un hende ku su país ta orguyoso di dje. Un persona ku su país ta konfia ku semper e lo ta diplomátiko, i ku e lo saka kara di su país unda ku e ta.

E embahador ta para pa pas, harmonia, unidat, kompreshon, interseshon, konsehá, enkurashá i sirbí ku apnegashon i ku amor.

Nos muchanan i nos hòbennan, yu di pastor, esakí ta un enkargo haltu pa boso. Manera e sita a bisa: “Muchanan por ta obrero mishonero aseptabel na kas i na misa. Dios ta deseá pa siña nan ku nan ta den e mundu akí pa duna servisio útil, no djis pa hunga.” (Mensahe pa Hòbennan, p. 225).

*“Mi por enfrentá tur kos pa medio di Esun ku ta duna mí forsa”
(Filipensenan 4:13, vershon Beibel)*

P.S.: Tòg nos ta pone un sekshon parti patras, espesialmente pa e chikitinnan, i pa esnan yòn di kurason.

Laso Spiritual:

EMBAHADOR YON I SU KONEKSHON KU SHELU

Un persona ku por ta un bon ehèmpel pa nos den esaki ta patriarka ENOK.

Enok a bira un predikador di hustisia, i tabata laga e hendenan sa kiko Dios tabata revelá na dje. Esnan ku tabatin temor di Dios, esta respèt p'É, tabata bai buska e hòmber santu aki, pa tende su instrukshon i su orashonnan. E tabata sali bai traha tambe den e públiko, papiando Dios Su mensahenan na tur ku tabata ke skucha e palabranan di spièrtamentu.



Sin parsialidat

Su labornan no tabata limitá na e desendentenan di Seth so. Den e tera kaminda Kain a bai purba skonde for di Dios Su presensia, einan e profeta di Dios tabata bai pa konta nan di e esenan maravioso ku tabata pasa dilanti Su bista den vishon. *"Mira,"* el a deklará, *"Señor lo bini ku miles i miles di Su angelnan santu. E ta bini pa dikta sentensia riba tur hende i kondená tur ku a kometé aktonan malbado, tur ku komo hende no ta tene kuenta ku Dios i a papia palabranan insolente kontra dJE."* (Judas 14, 15)

Fiel na reprene piká i maldat

E tabata reprene piká sin miedu. Miéntras e tabata roga ku nan pa bandoná nan mal kamindanan, e tabata reprene e malu ku tabata reina, i a spièrta e hòmbernan di su generashon ku siguramente huisio lo kai riba e transgresor. Tabata e Spiritu di Kristu ku tabata papia dor di Enok; por a ripará e Spiritu ei kla, no solamente den ekspreshonnan di amor, di kompashon i di rogamentu; no ta kosnan suave so e hòmbernan santu ta papia.

Dios ta pone riba lep di Su mensaheronan bèrdatan pa nan papia ku ta skèrpi i ta kòrta manera spada di dos banda.





E hendenan por a sinti e poder di Dios ku tabata traha dor di e hòmer aki. Algun a hasi kaso di e spièrtamentu i a renunsiá nan pikánan; pero e multitut tabata hasi bofón di e mensahe solèm. I a bira mas tribí den nan mal kamindanan.

Ta meskos den tempu di fin

E sirbidónan di Dios mester karga i presentá un mensahe paresido den último dianan, i e lo wòrdu risibí tambe ku inkredulidat i bofón. E mundu antidiluviano a rechasá e palabranan di spièrtamentu di esun ku tabata kana ku Dios. Asina tambe e delaster generashon lo tuma spièrtamentu di Señor Su mensaheronan den forma masha liviano.

Ekilibrio den ministerio

Meimei di un bida di labor hopi aktivo, Enok firmemente a mantené su komunion ku Dios. Mas grandi i mas preshon su labornan tabata pone riba dje, mas konstante i sinsero su orashonnan tabata. Na sierto periodonan e tabata sigui ekskluí su mes for di tur sosiedat. Despues di keda un rato meimei di e hendenan, trahando pa benefisiá nan ku instrukshon i ehèmpel, e tabata retirá, pa pasa un ratu den kietut ku hamber i set pa e konosementu divino ei ku Dios so por duna. Komunikando di e forma ei ku Dios, Enok a bin reflehá e imágen divino mas i mas. Su kara tabata bria ku un lus santu, asta e lus ku ta bria den kara di Hesus. Segun e tabata sali bai for di e komunionnan divino ei, asta esnan sin Dios tabata keda ku asombro pa e impreshon di shelu riba su kara.



Huisio divino lo bin

Maldat di hende a yega un altura asina haltu ku destrukshon a wòrdu pronunsiá kontra nan. Segun aña tras di aña tabata pasa bai, hundu i mas hundu e marea di kulpabilidad humano tabata bira, skur i mas skur e nubianan di huisio divino tabata hala mas i mas serka. Sinembargo Enok, e testigu di fe, a sigui fiho riba su kaminda, spièrtando, rogando, apelando, luchando pa bòltu e marea di kulpa, i pa wanta e klap di vengansa.

Dios a bai kuné

Ounke su spièrtamentunan a wòrdu ignorá dor di un pueblo pekaminoso, stimadó di plaser, e tabatin e testimonio ku Dios tabata aprobá i el a sigui batayá fielmente kontra e maldat ku tabata reina, te ora ku Dios a remové for di un mundu di piká na e gosonan puru di shelu. E hendenan di e generashon ei a chèrchè lokura di esun ku no tabata buska pa montoná oro òf plata òf pa akumulá poseshonnan akinan riba tera.

Pero Enok su kurason tabata fihá riba tesoronan eterno. El a wak na e stat selestial. El a mira e Rei den Su gloria meimei di Zion. Su mente, su kurason, su kombersashon tabata den shelu. Mas grandi e inikidat eksistente bira, mas grandi su anhelo pa e kas di Dios tabata. Miéntras e tabata ainda riba tera, e tabata pa medio di fe, den e esfera di lus. *“Bendishoná ta esnan puru di kurason; pasobra nan lo mira Dios.”* (Mateo 5:8). Pa tresshen aña Enok tabata buska puresa di alma pa e por ta den harmonia ku shelu. Pa tres siglo el a kana ku Dios. Dia tras dia e tabata anhelá di tin un union mas será; serka i mas serka e komunion a krese i bira, te ora Dios a tum’é pa Su mes. E tabata pará riba drèmpel di e mundu eterno, solamente un stap entre e i tera di esnan bendishoná; i awor e portanan a habri, e relashon ku Dios, asina hopi tempu buská riba tera, a sigui, i el a pasa dor di e portanan di e stat santu— esun promé di entre hende ku a dreña einan.

Impakto di su bida riba e hendenan

A sinti su falta riba tera. E stèm ku a wòrdu skuchá dia tras dia den spièrtamentu i instrukshon no tabata t’ei mas. Tabatin algun, tantu di esnan hustu i esnan malbado, ku a mira ora el a bai; i sperando ku kisas el a wòrdu depositá na un di su lugánan kaminda e sa retirá su mes, esnan ku tabata stim’é a busk’é diligentemente, meskos ku mas despues yunan di e profetanán a buska pa Elias; pero sin logra. Nan a raportá ku e no tabat’ei mas, pasobra Dios a bai kuné.

Dios Su lès pa nos ayera i awe

Dor di trasladá Enok Dios kier a siña un lès importante. Tabatin peliger ku hende lo entregá na deskurashamentu, pa motibu di e resultadonan temibel di Adam su piká. Hopi tabata kla pa sklama: *“Ki bal ku nos a teme Señor i a warda Su ordenansanan, ya ku tin un maldishon pisá riba e rasa, i morto ta nos tur su suèrtè?”* Pero e instrukshonnan ku Dios a duna na Adam, i ku Seth a ripití, i Enok a duna ehèmpel di dje den su bida, a bari kita e tristesa i skuridat ei i a duna hende speransa, ku manera dor di Adam morto a bini, asina dor di e Redentor primintí bida i inmortalidat lo bini.

Ponensia di Satanas versus Dios

Satanas tabata pèrta riba hende e kreensia ku no tabatin rekompensa pa esnan hustu òf kastigu pa e malbadonan, i ku tabata imposibel pa hende obedesé e statutonán divino. Pero den e kaso di Enok, Dios a deklará *“ku E ta eksistí i ku E ta rekompensá esnan ku ta busk’E diligentemente”* (Hebreonan 11:6, 5). El a mustra kiko E lo hasi pa esnan ku ta warda Su mandamentunan. A siña hende ku ta posibel pa obedesé e lei di Dios; ku ounke nan ta biba meimei di esnan ku ta pekaminoso i korupto, nan ta kapas, dor di e grasia di Dios, pa resistí tentashon, i bira puru i santu. Nan a mira den su ehèmpel e bendishon di un bida asina; i su traslashon tabata un muestra di e bèrdat di su profesia tokante kiko ta sigui despues di morto, ku su rekompensa di goso i gloria i bida inmortal pa esnan obedesido, i òf kondena, lamento i morto pa e transgresor. Dor di fe Enok *“a keda trasladá pa e no mira morto, ... Pasobra promé ku su traslado e tabatin e testimonio aki, ku el a agradá Dios.”* (Hebreonan 11:6, 5).

Meimei di un mundu kondená na destrukshon dor di e piká ku tabata reina, Enok a biba un bida di komunion asina será ku Dios ku no a permiti’é kai bou di e poder di morto.

E karakter deboto di e profeta aki ta representá e estado di santidat, ku tur ku ke wòrdu *“redemí for di e tera aki”*, mester tin (Revelashon 14:3) na e tempu di Kristu Su segundo benida. E ora ei, manera den e mundu promé ku diluvio, inikidat lo prevalesé. Siguiendo inklínashon di nan kurason korupto i siñansanan di un filosofia engañoso, hende lo rebeldiá kontra e outoridat di Shelu. Pero manera Enok, nan lo spièrta mundu di Señor Su segundo benida i di e huisianan ku lo bini pa motibu di transgreshon, i dor di nan kombersashon i ehèmpel santu nan lo kondená piká di esnan sin Dios.




TRASLADO DI E BIBUNAN HUSTU

Manera Enok a wòrdu trasladá pa shelu promé ku mundu a keda destruí dor di awa, asina e bibunan hustu lo keda trasladá for di tera promé ku e wòrdu destruí dor di kandela. E apòstel a bisa: *“Nos tur lo no drumi, pero nos tur lo keda kambiá, den un momento, den un fregá di wowo, na e último tròmpèt.”* *“Pasobra Señor Mes lo baha for di shelu ku un gritu, ku e bos di arkangel i ku tròmpèt di Dios;”* *“tròmpèt lo zona, i e mortonan lo lanta inkorruptibel, i nos lo keda kambiá.”* *“Esnan morto den Kristu lo lanta promé; despues nos ku ta bibu i a keda lo wòrdu kohé huntu ku nan den e nubianan, pa topa Señor den laira; i nos lo ta semper ku Señor. P’esei boso un konsolá otro ku e palabranan aki.”* (1 Kor.15:51, 52; 1 Tes. 4:16-18).

Saká for di Patriarkanan i Profetanan, kap. 6

DANIEL, EMBAHADOR EHEMPLAR



Daniel, un Embahador di Shelu ¹

Daniel i su kompañeronan na Babilonia tabata, den nan hubentut, aparentemente mas favorese ku suertè ku a toka José den su promé añanan na Egipto; sinembargo nan a pasa den pruebanan di karakter apénas ménos severo. For di e simpleza kompará di nan kas na Hudea, e hóbennan aki di realesa a keda transportá pa e stat di mas magnífiko, pa e korte di e monarka di mas grandi i nan a wòrdu selektá pa keda entrená pa drenta den servisio spesial di e rei aki. E tentashonnan ku tabata rondoná nan tabata fuerte den e korte korupto, yen di luho ei. E echo ku nan, ku tabata adoradónan di Jehová, ta katibu awor na Babilonia; ku e kòpi i weanan speshal di Dios Su kas a wòrdu pone den tèmpe di e diosnan di Babilonia; ku e rei di Israel mes tabata prisionero den man di e Babilonianan, tabata algu pa esnan ku a vense nan broma bisa na boka grandi ku esei ta muestra ku nan religion i nan kustumbernan tabata hopi mas superior na e religion i kustumber di e Hebreonan. Bou di sirkunstansianan asina, dor di e humiyashon ku Israel mes a buska pasobra nan a apartá for di Dios Su mandamentunan, Dios a duna Babilonia evidensia di Su supremasia, di e santidat di Su rekerimentunan, i di e resultado sigur di obediensia. I e testimonio aki El a bin duna dor di esnan ku te ainda tabata mantené nan mes fiel na dJE.

Pa Daniel i su kompañeronan, for di e komienso mes di nan karera, nan a bin haña nan mes ku un prueba desisivo. E instrukshon ku e kuminda ku nan tin ku haña mester bini for di e rei su mesa tabata tantu un ekspreshon di e rei su favor i di su deseo pa nan bienestar. Pero dor ku parti di e kuminda a wòrdu ofresé na ídolonan, e kuminda for di e rei su mesa tabata konsagrá na idolatria; i dor di partisipá di e kumindanan for di mesa di rei, esaki lo keda konsiderá komo nan muestra di homenahe na diosnan falsu. Lealtat na Jehová a prohibí nan di partisipá den esaki. Nan no tabata tripi tampoko kore rísiko di kai bou di e efekto debilitante ku luho i drispidimentu tin riba desaroyo físiko, mental, i spiritual.

Daniel i su kompañeronan a wòrdu instruí fielmente den e prinsipionan di Dios

Su Palabra. Nan a siña pa sakrifiká kosnan terenal pa kosnan spiritual, pa buska e bon mas haltu. I nan a kosechá e rekompensa. Nan kustumbernan di temperansia i nan sentido di responsabilidadat komo representantenan di Dios a desaroyá den nan podernan nobel di kurpa, mente, i alma. Na final di nan entrenamentu, den nan eksaminashon huntu ku otro kandidatonan pa e honornan di e reino, *“no a haña niun manera Daniel, Ananias, Misael, i Azarias.”* Daniel 1:19.

Na e korte di Babilonia a bini huntu representantenan for di tur pais, hòmbnernan ku e mihó talentonan, esnan mas rikamente dotá ku donnan natural, ku tin e kultura di mas haltu ku e mundu aki por duna; sinembargo, meimei di nan tur, e katibunan Hebreo no tabatin igual manera nan. Den forsa físico i beyesa, den vigor di mente i logro literario, nan no tabatin rival. *“Den tur asunto di sabiduria i kompromentmentu, ku e rei a puntra nan di dje, el a haña nan dies biaha mas mihó ku tur e magonan i astrólogoanon ku tabatin den henter su reino.”* Daniel 1:20.

Sin tambaliá den nan lealtat na Dios, sin entregá kontrol riba su mes, Daniel su dignidat nobel i su respèt kortes pa opinion di otronan a gana p'é den su hubentut e *“favor i amor tierno”* di e ofishal pagano bou di ken su enkargo e tabata. Mésun karakterístikanan aki tabata marka su bida. Rápidamente el a keda subi te na e puesto di promé minister di e reino. Dor di reinado di monarkanan susesivo, kaída di e nashon i stablesimentu di un reino rival,

“Su sabiduria i su arte di goberná tabata di tal forma, su takto i kortesia tabata asina perfekto, i su bondat genuino di kurason, a kombiná ku fidelidat na prinsipio, ku asta su enemigunan mester a duna boka i konfesá ku “no por a haña nada, pasobra e tabata un hende honesto i e no tabata falta nunca ku su obligashonnan.”

Daniel 6:4.

Miéntras Daniel tabata tene duru na Dios ku konfiansa firme, e spiritu di poder profétiko a bini riba dje. Miéntras e tabata honrá dor di hende ku responsabilidatnan di korte i sekretonan di e reino, el a wòrdu **honrá dor di Dios komo Su embahador**, i a siñ'é pa lesa e misterionan di siglonan pa bini. Monarkanan pagano, dor di asosiá nan mes ku representantenan di Shelu, a wòrdu obligá na rekonosé e Dios di Daniel.

“En bèrdat, bo Dios ta Dios riba tur dios i Rei riba tur rei i E ta revelá loke ta skondí.” (Daniel 2:47). I Dario, den su proklamashon el a bisa *“karta pa tur pueblo di tur nashon i di tur idioma na mundu, eksaltá e Dios di Daniel pasobra E ta Dios bibu awor i te den eternidat. Su reino lo no kaba nunca, Su reinado lo no tin fin; E ta salba i E ta liberá, i ...ta hasi señal i maravianan den shelu i riba tera.”* (Daniel 6:26-27).

Ki vokashon e Hebreonan nobel ei tabatin! Segun nan tabata yama ayó na e hogar di nan niñes, difisilmente nan por a soña di e destino haltu ku tabata warda nan! Fiel i firme nan a someté nan mes na e guia divino, asina ku dor di nan Dios por a kumpli ku Su propósito.



Mésun bèrdatnan poderoso ku a wòrdu revelá dor di e hòmbenan aki, Dios ta deseá di revelá dor di hòbennan i muchanan di awe. E historia di Hosé i Daniel ta ilustrashon di loke E por hasi dor di esnan ku someté nan mes na djE i ku henter nan kurason buska pa kumpli ku Su propósito.

“E falta mas grandi di mundu awe ta pa hòmbenan— hòmbenan ku lo no wòrdu kumprá òf bendé, hòmbenan ku te paden di nan alma nan ta berdadero i onesto, hòmbenan ku no tin miedu pa yama piká na su nòmber, hòmbenan kende su konsenshi ta mes fiel na deber manera e hangua ta den e kòmpas, hòmbenan ku lo para pa loke ta korekto ounke shelu bin abou.”

Pero un karakter asina no ta bini pa ak-sidente; no ta dor di fabornan òf kua-lidatnan speshal di Providensia. Un karakter nobel ta resultado di disiplina-propio, di someté e naturalesa baho na esun mas haltu— di entregá nos mes pa e servisio di amor na Dios i na hende.

Mester impreshoná e hòbennan ku e bèrdat kla ku nan kualidatnan no ta di nan. Forsa, tempu, intelektu, ta tesoronan fiá. Nan ta pertenesé na Dios, i mester ta e resolushon di kada hóben pa tin uso mas haltu pa nan. E ta un rama for di kua Dios ta spera fruta; un mayordomo, ken su kapital mester duna oumento; un lus, pa iluminá skuridat di mundu.

Kada hóben, kada mucha, tin un trabou pa hasi pa e honor di Dios i pa elevá humanidat.

¹ E.G.White, Education, p. 54-58

EMBAHADOR HÓBEN I POPULARIDAT



KADA KRISTIAN TIN E PRIVILEGIO DI TA UN EMBAHADOR PA KRISTU

Nos kada un, grandi i chikí i hóben, komo Kristian nos tur tin privilegio i responsabilidat den e mundu aki. Apóstel Pablo ta bisa den 2 Korintionan 5:20 “P’esei ata nos aki komo representante di Kristu (NIV ta bisa “embahadornan”); Dios mes ta uza nos pa hasi Su apelasjon na hende. Nos ta roga boso den nòmber di Kristu: laga Dios rekonsiliá boso kunE!”¹

Nan ta distinguí pa nan fidelidat (1 Kor. 4:1, 2; 1 Tim. 1:12), pa nan zelo, nan kompromendementu personal di i eksperensia ku bèrdatan grandi di e evangelio, i nan diligensia den estudio, den orashon, den gana almanan, i den edifiká iglesia. No tin dignidat òf honor mas grandi ku ser un embahador pa Kristu i pa e reino di shelu.² Palabranan di un himno ta bisa: “Mi ta un stranhero akinan, den un tera leu... Embahador mi ta di un reino mas ayá... Mi ta akinan riba negoshi pa mi Rei.”³

Komo embahador bo ta bin haña bo mes tin biaha, sin ku bo ke òf ta buska esei, ku bo por bira popular. Bo por bira hopi gustá, hopi pidí, i bo influensia ta konta unda ku bo ta, den tur loke bo hasi. Tin hende ta wak bo i tin hende ta sigui bo, nan ta kopia bo.

PELIGER DI POPULARIDAT

- Su bista ta bin fiha mas riba su mes ku riba Dios i otronan.
- E por bin bira eksaherá den forma di papia, bisti, peña, kanta, studia, traha, ets.
- E por bin usa i/òf manipulá hende pa su mes keda bon mirá i popular.
- E por bira mal mayordomo di tèmper, tesoro, talento, tempu
- Pa bo gran talento hende por bin sigui abo komo lider (*algun ta hasi esei siegamente*) i nan ta kita nan bista for di Dios, ku tur peliger ku e ta enserá (wak p.e. e kaso di Jim Jones).

BEIBEL ta bisa nos den Romanonan 12:3 “Dios a duna mi un enkargo, p’esei mi por bisa kada un di boso: no pensa ku boso ta mas di loke boso ta,

pero sea realístiko. Kada ken mester tin un konsepto humilde di su mes.”

Klaro ku komo hende bo ke pa hende gusta bo, i ta hasi kaso di bo ora bo ta papia, i mas ainda ora bo ta hóben. Konsehando komo adultonan ku a pasa kaba riba e kaminada aki di bida, akinan ta sigui algun konsehonan pa yuda i protehá nos hóbenan. Nos ta stima boso, boso ta futuro lidernan di iglesia, i Dios ta konta ku boso sosten.

1. **Semper ta prepará pa para bo so.**⁵ Bo ta kòrda e kantika ku tabatin den buki kantika bieu? “*Ser manera Daniel i para bo so. Tribi di keda bo fiel i para bo so.*”
2. **Nunka mancha bo lep ku mentira.** E bèrdat ta sali tòg un dia na lus. Evitá e bèrguensa ei dor di papia semper e bèrdat, pa inpopular ku e por ta. E bèrdat ta hasi nos liber!
3. **Sea sinsero i onesto.** Ser bo mes. No fingi algu ku bo no ta. Un dia e máskara

ta kai tòg!

4. **No rebahá otro pa abo subi.** Bo sabi, bida ta strañu. Esun ku hasi esei awe segun e ta fòrsa subi trapi pa e bai ariba den su trabou, estudio, ministerio, ets. mayan ku Dios ke, e por hañ'é ta topa mésun hendenan ei riba e trapi, ma e ora ei nan ta subiendo i abo ta bahando. Ki bon ta pa for di komienso, ora ta abo tabata na bûrt ku bo a trata nan ku kortesia i ku konsiderashon.
5. **Evitá keha.** Ta ken ta gusta hende ku ta bon keha i lamentá i ta piki fout i ta mira kos negativo so rònt di dje. Bo ta mara hende, shon! Stòp! Mas bien skohe pa ta positivo. Asta ora kos ta malu mes, si bo pidi Dios duna bo un aktitut positivo, i bo skohe pa neur, kanta un himno, bo beis ta bin drecha, i mas ainda si bo plak un sonrisa riba bo kara, i want'é un ratu. Praktik'é! E ta funshoná!
6. **Sea un bon skuchadó.** ⁴
 - Remové òf evitá distrakshon.
 - Ripará komunikashon no-verbal i e tono di bos.
 - Sea spil di e persona.
 - Empatisá, simpatisá i usa lenguahe di kurpa pa lag'é mira bo ta pone atenshon.
 - Praktiká silencio.
 - Hasi preguntanan klave.
 - No interumpí òf kambia e kombersashon.
 - Pensa promé bo respondé.
 - Skucha ku mentalidat pa siña.
 - Praktiká no huzga e persona.
 - Tuma responsabilidadat pa un kombersashon positivo.
 - Duna balides na esun ku ta papia i/òf ta demostrá su emoshonnan.
 - Haña arianan ku boso por ta di akuerdo.
 - Sea konfiabel i diskreto.
 - Tuma anotashon si ta nesesario.
 - Praktiká ser un bon skuchadó.

7. **Sa kiko bo ta kere i para p'é.** “Tin un individualidat den eksperensia Kristian ku mes-ter keda preservá den kada agente humano, i no por remové e responsabilidadat for di ningun alma. Kada un tin su mes bataya pa bringa, su mes eksperensia Kristian pa gana, independiente den algun aspekto for di kualke otro alma; i Dios tin lèsnan pa kada un siña pa nan mes, ku ningun otro por hasi p'é.” (2MCP 430)

8. **Persistí hasi loke ta bon.** “Solamente ora egoismo ta morto, ora a deshasí di lucha pa supremasía, ora ku gratitut ta yena e kurason, i amor ta hasi e bida fragante— ta e ora ei so Kristu ta bibando den e alma, i nos ta keda rekonosé komo obrero huntu ku Dios.” (COL 402; ML 118; MYP 209; 1 SM 101, 333).

9. **Tene bo mes puru.** “Anto esun ku ta karga e speransa aki den Kristu, ta mantené su mes puru, meskos ku Kristu mes tambe ta puru! (1 Juan 3:3; Tito 1:15).⁵

“Nunka tin un tempu òf lugá ora ku Kristu Su embahadornan ta stòp di ta embahador! Ta bèrdat, hopi di Kristu Su embahadornan ta mal ehèmpel i ta trese desonra riba Su nòmber santu, pero unabes bo a bira un embahador dor di e nasementu di nobo, bo ta embahador te dia bo muri!” ¹

¹ [Microsoft Word - Ambassadors_for_Christ.doc \(drdonjennings.com\)](#)

² Komentario Bíbliko, tomo 6, p. 870

³ Komentario Bíbliko, tomo 6, p. 1086

⁴ [How To Be A Good Listener \(15 Simple Ways To Improve The Conversation\) \(liveboldandbloom.com\)](#)

⁵ Mel Johnson “Tip For Teens.”





Ehèmpelnan Bíbliko

EMBAHADORNAN CHIKÍ

Guera ta kruel. E mucha muhé chikí a wòrdu hiba for di su kas, i awor e tabata den un pais enemigu, aparentemente bandoná dor di Dios i sin konsuelo òf speransa. Parse ku bida tabatin masha poko bon den dje p'é, i e por a bira amargá, di mal humor i tristu, si el a pèmití su pensamentunan sentra riba su mes i su suèrtè infelis. Pero asta den un pais straño Dios tabatin un servisio pa e kumpli kuné.

Sirbi komo kriá di Naaman su kasá

E sirbidó koutivo tabata biba un bida di katibu, fòrsá pa sirbi den kas di e komandante di e armadanan ku a destruí Israel. Pero e lo mester tabata fiel den su servisio, pasobra di otro forma nan lo no a tum'é komo sirbidó den kas di un ofishal importante.

Ku e profeta

Ounke koutivo, e sirbidó no a lubidá su pais òf su Dios. E no a pensa malu tampoko di e hendenan ku a kohé preso i a fòrs'é bai sirbi inboluntariamente. Yená ku amor pa su Dios, su kurason a sinti duéle pa su shon i su señora ku tabatin ferdit. Na lugá di pidi maldishon riba Naaman pa e mala suèrtè ku el a trese riba dje, el a deseá bon p'é i tabata spera pa e rekuperá for di e malesa teribel ei. Kòrdando riba e obranan milagroso di profeta Eliseo na su pais, e tabatin fe ku e profeta por kura Naaman for di su lepra. E tabata kere ku loke Dios a hasi dor di Su sirbidó na Israel, E por hasi tambe pa un hende di un rasa stranhero.

E profeta ta kur'é

Tabata konsiderá lepra komo un enfermedat inkurabel. Pero mayornan di e kriá Hebreo a siñ'é ku nada ta imposibel pa Dios. E mayornan a kumpli bon ku nan responsabilidat, i komo resultado tabatin e testimonio maravioso aki na fabor di Israel su Dios den un tera ku no tabata konos'É.

Naaman a bin siña di un poder mas aya di poder di hende, pasobra un tata i un mama fiel na Israel a lanta nan yu pa stima i konfia Señor.

Un a bai konta

Esta, Naaman a bai serka su señor e rei di Siria i a kont'é palabranan di e mucha muhé koutivo. E mucha muhé no tabatin idea mes di e impakto ku su palabranan di fe den Dios a hasi. Naaman a kere pasobra e mucha muhé chikí tabata kere, i el a hiba e mucha su testimonio dilanti di e rei di Siria. Di e forma aki Benhadad a bin sa ku Israel su Dios ta un Dios di poder i un Dios di amor. El a derotá e armadanan di Israel den bataya i e por a bin kere pa su mes ku su diosnan di Siria tabata muchu mas poderoso ku Jehová. Pero e mester a bin siña ku e Dios di Israel por hasi loke ta mas aya di poder di hende pa nan hasi i mas aya ku e poder di diosnan di Siria.

“E testimonio mas grandi ku por hasi na fabor di e Dios di shelu ta testimonio di un persona kende su bida ta reflehá konfiansa absoluto den djE.”

Lo mi duna bo

Testimonio di fe di e kriá yòn a krea konfiansa no solamente den komandante di e ehèrsito di Siria, pero el a spièrta tambe un midí di fe den kurason di Siria su rei. Fe ta spièrta fe i amor ta spièrta amor. Fe ta un sirkulo ku semper ta span i ta sigui bai for di kurason pa kurason i for di tera pa tera, te ora ku e sirkulá e globo. Ta eternidat so por midí resultadonan di e testimonio di konfiansa den Israel su Dios, tresé dor di un mucha muhé katibu na su shon

den un pais stranhero.

Su shon ta kura

Nos por lesa henter restu di e historia kontá den 2 Reinan 5. Einan nos ta mira di e karta ku kapitan Naaman a bai kuné pa rei di Israel, di skermentu di paña i un mal ambiente di deskonfiansa ku tabata reina. Nos ta mira ku dia bieu Dios a bisa Su profeta kiko tabata pasando te ku e profeta a manda yama kapitan Naaman pa bin serka dje pa e haña kurashon pa su kurpa i restourashon di alma. E profeta tabata deseá pa Naaman sera konosí ku e amor i poder di Israel su Dios, i pa e hiba bèk pa su mes pueblo un mensahe di konsuelo tokante speranza ku tur por haña den djE. E hogar di kada yu di Dios mester ta un haf di deskanso pa tur ku tin mester di dje.

Nos ta lesa kon rospondi a bini serka e kapitan pa e bai baña pa e kura, i kon e kapitan a sinti masha hopi ofendí, pa su dignidat mester bai baña den e awa sushi di Jordan ei, pa e kura? Su fe a haña un deuk. El a traha planan pa su mes kon tur kos mester a bai i el a spera ku Dios lo a traha segun *su* plan...Ora nos traha for di padilanti e kaminda di Providensia, nos por spera gran desapuntamentu. E hòMBER ku ke salba i kana den kaminda di Señor mester siña ku Dios Su kamindanan ta infinitamente mas haltu i mihó ku e kamindanan di hende (Isaias 55:8, 9).

Danki Dios pa bon sirbidónan ku e tabatin, aparentemente mas sabí ku nan mes shon. Kapitan Naaman a obedesé i el a kura.

Ora Dios papia dor di un profeta, semper ta balelapena pa pone nos mes opinion un banda i aseptá e mensahe di Señor. Solamente asina nos por haña nos mes ta kana den e kamindanan di Dios i partisipá di Su bendishonnan. Señor semper ta serka di esnan ku ta apresia Su bendishonnan.



E lès pa nos tur

Si kada yu di Dios tabata mes fiel den duna testimonio di djE manera e kriá katibu Hebreo, tur habitante di tera lo bin haña sa di e amor i kuido maravioso di e Kreador i hopi lo bin duna alabansa i gradisimentu na djE. Den kada pais tin esnan ku ta mes onesto i sinsero ku Naaman, i ta sperando solamente pa e testimonio fiel i di bidanan santu di e pueblo di Dios, promé ku nan entreg'É nan kurason.

Fuente:
Komentario Bíblico, tomo 2, p. 874-880



**SEÑALNAN DI STÓP
PA EMBAHADORNAN YÓN**

SEÑALNAN DI STÒP TA ÚTIL DEN HOPI ASPEKTO.

Algun di nan ta den por ehèmpel tráfiko, pasobra esei lo yuda evitá aksidente ora un hende:

- Kore pasa duru dor di lus kòrá, sin paga tinu na e lus.
- Ora ku un shofür bira hanchi unbes na man drechi bai, sin para pa wak promé na man robes si tin vehíkulo ta bini, anto sin wak e bòrchi.
- Ora ku e konduktor sigui kore stret bai den un krusada, sin paga tinu ta ken tin preferensia einan.

Señal di stòp ta útil tambe den relashonnan, p.e.:

- Pa sa ki ora stòp di heilu pa algu serka bo mayornan. No tin un bòrchi pa kòrdá bo, pero den bo bo ta sinti ku mihó mi stòp di papia, pasobra nan pasenshi ta bai kaba ku mi.
- Òf ora ta halando un hende su atenshon, pa sa ki ora ta sufisiente. E no ta un bòrchi visibel, pero Spiritu Santu ta duna bo e impreshon pa keda te ei ku e kombersashon.

Meskos tambe tin señal di stòp den por ehèmpel, komentu. Einan bo mente, bo stoma i bo boluntat ta traha huntu pa laga bo sa ku:

- Mihó no kome tal kuminda mas, pasobra e ta gòrdá bo, pasobra e por duna bo diabétis, òf kualke otro problema di salú.
- No kome mas! No fòrsa! E lo no probechá bo tòg! Kier men, kome na midí.

Asina tambe tin algun señal di stòp pa embahadornan yòn, pa muchanan, pa hóbennan i hóbén adulto ku Dios a trese

den un famia di ministerio, i ku Dios ta duna enkargo speshal. Tin ku bisa ku esaki no ta konseho pa yunan di pastor so, pero tambe pa tur nos muchanan i hóbennan, serka, òf leu na otro país.

I. STÒP DI SKONDE PA STÈM DI DIOS

Den Beibel nos ta haña relato di Kain i Esau su bida. Nan kada un a lanta den un kas kristian. Huntu ku nan ruman, nan tambe a siña di Dios, pero nan dos a hasi oreá surdu, i a hunga kèns. Ma esei no a kita nan kulpa. Nan a keda responsabel pa nan eskoho i e konsekuensianan. Meskos tambe tin e kaso di Hòfni i Phinehas. No tin ekskius!

Abo, sea bo ta un mucha òf un hóbén, stòp di skonde pa stèm di Dios. Komo un Tata di amor, ku ta stima tur Su yunan, i ainda mas, esnan ku ta mala mucha, terko, tribí, prufiá, orguyoso, desobedesido, E ta stima nan mas i ta traha mas ku nan, pa skapa nan tur for di trampanan ku ta skondí, ku nan bista nublá no ta mira, pero Dios sí ta mira diabel su trampanan kla kla.

II. STÒP DI KORE PA BIDA

Bo no por keda beibi pa semper i pretendé ku bo por bai sobrebibí riba lechi so. Bo ta muri shon! Bo tin ku krese, no di kurpa so, pero tambe di mente, i spiritualmente.

Bo tin ku madurá i sigui dal stap bai dilanti den bida. E por spantá bo kon lihé dianan ta pasa, i lunanan i añanan ta bula pasa bai. No hay modo! Esaki a pasa ku nos tur, sea nos ke òf nò, nos tin ku konfrontá bida diario, pero bo sa, esta dushi ta, ku ora abo i ami pone DIOS na promé lugá den nos dia, kada dia di nobo, ah.... E mes ta instruí nos, E mes ta fortalésé nos, E mes ta inspirá nos i E mes ta bai ku nos den e dia i E ta bendishoná nos grandemente. Purb'É pa bo mes!

III. STÒP DISKUTÍ KU BO KONSENSHI

Esei ta Spiritu di Dios, sí atrobe papiando ku bo, kalanchando bo pa tuma e bon desishon.

Kua e ta?

- Pa legumai pèrdè bo tempu ta bon sinta wak televishon i/ òf hunga wega di kòmputer, òf riba telefon, òf ta gasta tempu lesa buki i no ta duna un man pa yuda ku trabou den kas.
- Pa bai sigui sierto rango di estudio.
- Pa bo evitá sierto amistadnan, i sierto lugá kaminda bo ta bai.

Mas bien bo sa, hóbén? Bo tin ku duna danki na Dios ku *ainda* Su Spiritu Santu ta papiando ku bo, pa bo bon. Kier men, bo tin chèns ainda pa dal e bon stapnan i pa mehorá bo porvenir.

IV. STÒP ESKUSÁ BO MES PA BO PIKÁ

Duna boka ora bo ta fout! Pidi despensa, anto sigui padilanti ku Dios Su ayuda. Mas bo keda tapa, mas bo keda skonde i purba lubidá e piká, e no ta bai di su mes, ma e ta keda kome bo manera kanser i ta amargá bo bida i bida di esnan ku bo ta biba òf ta anda kuné. Asina, atendé!



Bo tin ku rekonosé bo fout na e persona i despues na Dios, pa bo por tin pas. Bo'n ke tin pas di mente i di kurason? Bo'n ke biba aliviá di e karga ei i ta kapas di por wak tur hende trankil den nan kara sin e remordimentu ei mas? E ta duru, mi sa! Orguyo i bèrguensa ta tranka nos, pero kòrda, e kos ei *no* ta bini for di Dios, e ta bini di diabel, i ta pèrdè so bo ta keda pèrdè kuné. Purba ku Hesus!

V. STÒP DI PÈRDÉ TEMPU!

Mi mama tabatin un palabra ta bisa i mi tambe a bisa mi yunan esei:

**“Tempu ta sigui kana
bai i e no ta warda
riba niun hende!”**

I ora para analisá e dicho ei, nos tin ku rekonosé ku e ta bèrdat. Djis wak den bo dia kon lihé ora ta bula pasa bai. Inkreibel!

Ta nos tin ku siña biba ku oloshi, i pone tempu fiho pa kada kos ku nos ke logra den e dia, pa asina manera mainta habri nos ta kuminsá ku nos skèdjel apuntá, i un pa un atendé kada kos den e dia i nos lo logra, ku Dios Su ayuda.

Ohalá abo tambe ta pone DIOS na promé lugá den bo dia, pa pasa tempu den estudio di Su palabra i den orashon. Pasobra papia un, papia dos, nos no por hasi nada drechi sin Dios Su ayuda. Ta E ta tur kos pa nos, manera Lamentashonan 3:24 ta bisa: *“Mi ta bisa mi mes: ‘Señor ta tur kos pa mi, p’esei mi ta pone mi speransa den djE.’”* Dios dilanti, Dios patras, Dios na komienso di dia, Dios na final di dia, Dios pa tur tur desishon ku mester tuma den e dia, asta esun di mas chikí, nos por ta sigur ku E lo ta manera un tranké rònt di nos, pa warda di tur malu ku nos ta mira i esnan ku nos wowonan no ta mira.

Ku Dios por bendishoná kada un di nos muchanan i hóbennan ku nos ta stima y yuda boso ta bon embahadornan fiel.

Fuente: Mel Johnson, Tips For Teens, p. 16



verywell

EMBAHADOR YÓN I TEMPU



KON NOS TA USA TEMPU ¹

Outor Vere V. Loper a yega di bisa: “Mas importante ku e añanan ku ta pasa bai ta kiko nos a hasi ku nan. Tempù no ta hasi nada otro sino pasa bai. Ta bobo pa bisa, “tempù lo kontá”, “tempù lo kura”, “tempù lo saka posibilidatnan den dje.” Tempù no ta hasi niun di e kosnan ei. Tempù ta solamente bin i bai. Tempù no ta yuda un hende pa yuda su mes. E forma kon nos ta usa tempù ta loke ta kontá.”

Tin biaha un mucha òf hóben por pensa ku e ta yòn, e tin tur tempù di mundu pa hasi su desishonnan, pues lag’é tuma bida trankil. Pero, laga mi kompartí ku bo algu ku mi a lesa.

TEMPU TA SÈN.² Nos no tin derecho pa malgast’é. Na trabou ta paga nos pa e tempù ku nos pasa trahando. Tantu tempù i sèn ta presioso. Si nos manehá nos tempù bon, nos por manehá nos finansa mas mihó.

TEMPU TA BIDA.² Balor’é grandemente. E presente ta un regalù ku bo tin. Kier men, bo ta halando rosea. Ta un chèns pa hasi un kambio, un otro chèns pa purba atrobe. Un chèns pa logra bo metanan. Awor aki bo por hasi desishonnan ku por afektá bo futuro i mehorá bo bida.

TEMPU TA PODER.² Nos no tin derecho pa drispidi’é. Ora bo tin tempù, asina hopi kos bo por hasi, pa hasi bida mas felis i hopi mas hustu pa esnan ken su bida ta kargá awor aki ku preokupashon di bida. Bo por yuda aliviá nan for di desesperashon. Ta e desishon mester kai, ken tin poder riba ken? Tempù tin poder riba bo, òf abo tin poder riba tempù? Pasobra, un hende ta traha tempù pa e kos ku e ke. No ta asina?

TEMPU TA INFLUENSIA.² Nos no tin derecho di tir’é afó. Si bo ta puntual na bo skol, na bo trabou, na bo kompromisonan, i na bo si-tanan, bo ta laga hopi bon in-fluensia riba hende, i kaminda por habri maraviosamente pa bo, pasobra bo ta mustra di ta responsabel i ta respetá otronan su tempù.

TEMPU TA DI DIOS.² E ta duná na nos pa un propósito. E ta un regalù di Dios. I komo mayor-domo nos ta responsabel pa e forma kon nos ta usa nos tempù.

TEMPU TA SAGRADO.² Nos mester duna kuenta pa kada momentu. Ta tempù ku bo ta konsiderá komo sagrado, bo no ta laga nada interferí kuné. Na esei bo ta dediká bo mes. Meskos, sabat ta tambe un periodo sagrado di 24 ora, dediká na Dios. Nos no mester laga nada, ni niun hende stroba nos di pasa e oranan ei ku Dios i ku famia i ministrá manera Hesus.

TEMPU TA SABIDURIA.² Nos no tin derecho di ta ignorante. Salmo 90:12 ta bisa: “*Asina anto, siña nos kontá nos dianan, pa nos por presentá na Bo un kurason yen di sabiduria.*” Komentario Bíblico, tomo 3, p. 842 ta splika: “Òf haña un kurason di sabiduria.” Ta Dios so ta mira e fin for di komienso, pero nos mester pidi grasía pa aktua komo si fuera nos ta mira e fin ei. Nos mester meditá riba kon kòrtiku bida ta, pa nos por ta sabí pa usa e tempù ku Dios a regalá nos den e mundu aki. Outor F.W Farrar a komentá: Ayera no ta di nos mas; mayan kisas nunca lo ta di nos; awe ta di nos, i den e bida presente nos por rèk man na e kosnan ku ta nos dilanti.

TEMPU TA PREPARASHON PA ETERNIDAT ¹

HÓBEN: E ta muchu felis pa pensa. “Ta resta mi hopi tempù ainda,” e ta bisa.

HÓBEN ADULTO: E ta muchu okupá pa pensa. Buskando mas oro.

E MIHÓ AÑANAN DI BIDA: Ta muchu ansioso pa pensa. Preokupashon a tuma over.

BIRANDO GRANDI: Muchu bieu pa pensa. Bida ta gastá. Kurason bieu mas duru pa haña tempù.

KAMA DI MALESA: Muchu malu pa pensa. Swak, awor, i sufriendo mi so.

MORTO: Muchu lat pa pensa. Rosea di bida a bai. Oportunidat ta pèrdí awor!

ETERNIDAT: No tin mas tempù pa pensa. Dios Su misericòrdia a pasa. Mi ta lat!



No laga esei pasa ku bo, hóben. Biba sabí AWE! Awe bo tin, mayan bo no sa di dje. Sea agradesido na Dios, i hasi bon uso di e tempù ku bo tin awe.

¹ Sword Scrapbook No. 2, p.134, 138

² Mel Gibson “Tips For Teens.” p. 16.

[Why Time is So Important in Life \(stevenaitchison.co.uk\)](http://www.stevenaitchison.co.uk)





DI TUR



UN POKO!

Happy
Birthday



ADVENTIST HERITAGE LIBRARY



MR. CREATOR'S Borrowed BROWN HANDS



YVONNE DAVY

1. TEROR DEN ANOCHI

Mary tabata sinta riba stupi dilanti porta di su kabina di un kamber so zoyando su beibi den su brasanan segun e tabata 'kanturiá' (neur) un melodia simpel. E solo di wenter kasi no tabatin niun kalor, pero a lo ménos tabatin klaridat. Den e kabina tabata skur, skur manera su pensamentunan. Melissa bunita di kuater año, i Jim robusto di dos año, tabata hunga den tera banda di su pia.

Djadumingu pasá— tabata solamente djadumingu pasá, òf tabata shen año pasá— su esposo Giles a kana bini for di plantashon di Grant, i durante nan poko oranan trankil huntu e tabata ta felis, oh, si asina felis. Despues ayera nan a trese palabra p'é ku Giles a kai for di garoshi ora nan tabata transportando palu, i su bida a wòrdu machiká sali. Nunka, nunka lo e ta realmente felis atrobe!

Mary a nase na plantashon di Grant djeshete òf djesocho año pasá i no tabata sa kiko kier men ta liber, pasobra tantu su tata i su mama tabata katibu. El a wòrdu fòrsá pa traha duru. Si e pone su mevrouw disgustá, nan tabata sut'é severamente. Su mevrouw no tabata un muhé kruei, pero e no tabata kere ku katibunan tin sintimentu. Afortunadamente, Sra. Grant tabata generalmente di bon beis, asina no ta hopi bes Mary tabata hasi kos ku e no ta gusta. Nan tabata trata e katibunan na e plantashon di Grant bon, konsiderando tur kos; i tabata duna nan sierto tempu liber. Giles, un katibu hóben fuerte i bon tipo, a keda hopi atraé na Mary ketu ku maneranan suave.

Moses Carver, ku tabata doño di e plantage serka di esun di Grant, no tabata kere den sklabilitut. "Niun hende tin derecho di ta doño di un otro ser humano, no importá ki koló e tin," e tabata bisa hopi biaha, asina e mes no a kumpra niun hende pa yud'é den su kunuku. E tabata prokreá i kria kabai. Pasobra e tabata hopi ekonómiko, rumor tabata kore ku e lo mester tin algun montón di sèn skondí un kaminda den su kas.

E Carvernan tabata tin solamente un yu; i ora e beibi mucha muhé ei a wòrdu pone den un graf na kabes di seru, Sra. Carver a sinti bieui i kansá.

"Moses, mi no por hasi tur e trabounan di kas manera mi tabata hasi promé," el a kuminsá keha. "Mare bo por a buska un mucha muhé katibu pa yuda mi."

"Pero Susan, bo sa kon mi ta sinti tokante katibunan. Esei no ta korekto. Hende no ta manera bestia di kria òf kabai, pa bo bende i

kumpra nan."

"Sí, pero mi no por hasi e trabounan mas." I e tabata sakudí su kabes segun e tabata saka rosea pisá afó.

Al final, preokupá pa mira su kasá su kara kansá, Moses a kana bai na e plantashon di su bisiaña.

"Kolonèl Grant, mi tin mester di un mucha muhé yòn pa yuda mi kasá ku trabou di kas. Kisas bo tin un ku mi por kumpra?" el a puntra.

"Wèl sí, mi tin un mucha muhé fuerte, saludabel di djestres año ku lo ta nèt bon pa bo," tabata e kontesta.

Tan pronto ku Moses a mira Mary, e tabata sa ku Susan lo bin stim'é. Boluntariamente el a paga Mr. Grant e \$700 pa e mucha muhé yòn. I Moses no a ekibuká su mes, pasobra Susan su wowonan a bria ora Moses a trese Mary den nan kushina.

Mary tabata tur konfundí i ku miedu. E tabata maraviá ta kiko futuro lo tin p'é. Su doño nobo lo ta kruei i hopi demandante? Tabata duru pa bai laga su amistadnan, espesialmente Giles, ken e tabata stima asina hopi. Pero Mary no tabatin pakiko tin miedu, pasobra e señora su kara a bria ora el a wak e dushi mucha muhé trankil. El a bin purá dilanti i a pone su brasa rònt di su skoudernan.

"Mi kasá ta bisa mi ku bo nòmber ta Mary. Mi ta hopi kontentu ku bo a bin biba serka nos, Mary," el a bisa kalurosamente.

"Danki, señora," Mary a kontestá.

"Nò, mi yu, no yama mi 'señora.' Bo por yama nos Tio Moses i Tanta Susan. Bo ta parti di nos famia awor. Bin, nos tin hopi trabou pa hasi, asina ban kuminsá." Tanta Susan tabata papia ku mas brio i alegría di loke e tabata hasi pa basta tempu.

I asina kosnan a sigui for di e tempu ei. Tanta Susan semper ta einan trahando banda di Mary. E mucha no tabata sinti ku e tabata un katibu; mas bien e tabata parti awor di e famia. Kolonèl Grant tabata laga Giles bai kada djadumingu na e kunuku Carver, i klaro, Mary simplemente tabata biba pa e oranan ei ku nan por ta huntu.

Ora Melissa chikí a nase pa Mary i Giles, Tanta Susan a aktua komo si fuera e tabata realmente wela di e yu. El a kose shimisnan chikitu pa e beibi i a traha un dekel speshal pa keinta e yu su kurpa den wer friu anochi. Jim a yega dos año despues. E tabata fuerte i pronto e tabata kana mishi tur rònt den kurá. Beibi George tabata hopi diferente. E tabatin solamente dos luna ora e muchanan a haña ferkout pisá ku tosamentu. Melissa i Jim a

kura lihé di e tosamentu i ferkout, pero no tabata asina ku e último beibi aki, ku tabata mas delikado. E tabata tosa te ora su lepnan chikí tabata bira blou, i Mary tabatin miedu ku e lo bai muri.

Na momentunan asina tabata gran konsuelo pa Mary ora ku Giles ta serka. E tabata tene e beibi delikado den su brasanan fuerte, i parse ku e kalor di su mes kurpa tabata duna un efekto kalmante riba e tosamentu inkontrolabel. Pero awor, Giles no tabat'ei mas. Segun e bèrdat kurú ei a bini ku tur su forsa atrobe na mente di e mama yòn aki, su kurpa a kuminsá sakudí di snekmentu. Pakiko e mester a muri? Siguramente nada por ta mas pió!

Esakinan tabata dlanan hopi malu. E estadonan di sùit a separá for di e Union. Tabatin guera, un guera spantoso kaminda ruman ta bringa kontra ruman. Carver su simpatia tabata ku esnan di Nort, pasobra e tabata deseá mara Lincoln i su armada gana e guera i libra e katibunan. Mientrastantu tabatin bandidunan kibradó di lei ku tabata rondia razu na henter e teritorio na frontera, hòrtando esnan ku no tabata suficiente fuerte pa resistí nan i nan tabata hòrta kualke katibu i animal ku nan topa. Despues nan tabata bende e katibunan na merkadonan na Louisiana òf Texas pa preisnan hopi haltu ku tabata hasi nan un poko mas riku.

Un atardi Moses Carver a trese un rospón di di spanto pa tantu Susan i Mary: “Mi a tende den stat ku e bandidunan a razia den e teritorio no leu di akinan. Si nan mester bini na nos kunuku, Mary, bo mester hui bai mas lihé ku bo por ku e yunan na e kueba ku mi a koba bou di e kas di lechi. Si nan mester kapturá bo, mi no sabi kiko mi lo hasi, mi yu.”

Un anochi skur Moses a tende zonido di hopi pata di kabai biniendo den direkshon di su kunuku chikí. Mésora e tabata sabi kiko esei kier men. El a bula for di su kama i, rankando su karson bisti purá riba su pijama, el a kore bai pafó na e kabina di Mary i a sakudí'è for di soño.

“Lanta, Mary. E bandidonan ta akinan. Kohe e muchanan i hui bai na e kueba,” el a mand'è segun el a pone un dekel rònt di Melissa su skoudernan.

“Ta kiko ta pass”—“Mary a kuminsá.

“No hasi pregunta. Hasi manera mi bisa. Kohe e muchanan i kore bai na e kueba bou di e kas di lechi, i no sali te ora mi bin yama bo,” el a duna òrdu segun el a push'è den direkshon di porta.

I e no tabata ni ún minüt muchu lihé.

Apenas Mary tabatin tempu pa sera e porta ora ku e grupo di bandido ku maskara bistí a drenta den e kurá. Nan a bati duru riba porta di kushina i a menasá ku nan lo kibr'è si no habri'è mésora. Segun Carver a habri'è pa nan, nan a pusha brutu bin paden.

“Unda bo sèn ta?” nan a demandá.

Moses a traha hopi duru pa hopi aña pa kada sèn ku e tin i e no tabata bai regalá su sèn na e bandidunan ei.

Ora Moses a nenga di papia, e lider a blaf un komando. “Pronto nos lo lòs e lenga kabesura ei di bo,” el a menasá segun su hòmbernan a gara Moses.

Nan a lastr'è bai pafó kuné i nan a mar'è ku su guièl na rama di un palu di walnot. Nan a zuip e, pero el a tene su lepnan duru riba otro i a nenga di bisa su sekretu. Despues nan a kohe un flambeau i a tene esaki bou di su plant'i pia i a kima nan kruelmente.

Moses a lòk su kabainan den nan koral skondí, leuden mondi. E animalnan a haña holó di e karni ku tabata kimando, i nan a sinti peliger, nan a kuminsá un estampida denter di e murayanan kaminda nan tabata será. E bandidonan a tende e boroto i nan a pensa ku ta militia tabata biniendo. Spantá ku nan a hinka nan mes den un trampa, nan a bula riba lomba di nan kabainan i a hui.

Komo último gesto di vengansa, nan a tira e flambeau den e stal, i pronto e edifisio di palu i e yerba seku tabata tur na kandela.

Despues ku e hòmbernan a bai, Tanta Susan a kore bin pafó pa kòrta kabuya i lòs su kasá. El a purba karg'è, pero esaki tabata muchu pa su forsa frágil, asina, na lugá di esei el a yud'è kokochá bai den kas, kaminda el a kai morto kansá riba kama.

“Pero nan no a haña mi sèn,” el a bisa seriamente. En realidat, ta ken lo hinka den nan kabes pa bai buska sèn bou di e kasnan di abeha den un skina di kurá! “Bai i yama Mary,” e tabata keña segun el a pèrdè kono-sementu di doló.

Tanta Susan a trata su kasá su heridanan mas mihó ku e tabata por, i tabata pone katalasma kalmante riba nan. Poko poko su pianan a kuminsá kura, i e por a kuminsá kana rònt atrobe.

Melissa i Jim no tabata mas pió pa e eksperensia di e anochi ei, pero e tosamentu di George masha chikí a bira grave. Tanta Susan a traha un meskla di yerbanan i honing, i ki ora ku e chikitín tabatin un tosamentu pisá ku tabata pone manera pega, e tabata pone guli un kuchara di e stropi, ku tabata yud'è

hala rosea atrobe.

“Mi tin un sintimentu den mi wesunan ku nos no a mira e bandidunan ei pa último bes,” Tio Moses a bisa e hende muhénan un atardi. “Nan lo bin bèk, i nan lo kohe tur loke nan por haña. Mi ta djis spera ku nan lo no haña abo, Mary. Bo mester ta kla pa kore bai mésora, sin tarda na e kueba. Mi no tin intension pa keda warda riba nan mas den e kas aki!”

I e tabatin muchu rason. Tabata un anochi friu ku mal tempu ora ku bientu a trese e zonido horroso ei na Carver su oreanan—oreanan ku parse por tende asta den su soño. Mésora el a manda Tanta Susan na e kas di lechi, despues el a kokochá bai yama Mary.

“Nan t’ei, Mary. Hasi lihé!” el a urgi.

“Pero, Tio Moses ta asina friu pa George—”

“Gara un dekel anto bin. Mi ta hiba e otro dosnan.” E hòMBER a bùk pa kohe e muchanan, un den kada brasa. Jim a habri un wowo, despues el a lèn kontra e garganta kayente, pero Melissa tabata difísil. E tabatin miedu i tabata tene duru na saya di su mama.

“Ban, Mary, ban,” e hòMBER a roga.

“Abo bai; mi ta sigui,” el a kontestá segun el a kohe e beibi ku tabata na soño. E tin ku kohe tambe e bòter di stropi di tosamentu? El a kana bai na e mesa, pero parse el a lubidá kiko e tabata bai hasi i el a bira kohe un dekel. E tabata move manera den un mal soño, inkapas di hasi nada lihé. El a duda un minüt muchu largu. E hòMBERNAN maskará a kibra drenta den e kabina chikí i nan a graps e.

“Laga mi kohe paña kayente pa e beibi,” el a roga.

E hòMBERNAN no tabata niun tiki interesá den e beibi. Nan a rank’é bai kuné, te ainda ku su beibi duru tené den su brasanan, i nan a his’é brutu pone riba un kabai. Nan a hisa Melissa pone su dilanti i nan a ranka sali bai den e anochi.

Tio Moses i Tanta Susan a keda den un grupito pegá huntu den e kueba ku Jim chikí i sperando pa Mary sigui nan. Ora nan a tende e zonido di pata di kabai, nan tabata sa ku tabata muchu lat. Ansioso nan a warda te ora tur kos tabata ketu atrobe; despues nan a sali purá pa e kabina. Tio Moses a kuminsá yama, “Mary! Mary!” Pero solamen-

te e èko a bin bèk serka dje. Porta di su kabina tabata zoya dal bai bin den e bientu fuerte i friu, i e kamber tabata bashí.

Moses Carver tabata tur confundí. El a akusá su mes ku nan a kapturá Mary. “Si solamente mi no a kumpr’é, e lo tabata safe na e plantashon di kolonèl Grant. Nan lo no tribi atak’é, pasobra e tin demasiado katibu einan pa bringa kontra dje. Pero nan a pensa ku nan por a haña mi pasobra mi ta traha mi so,” e tabata bon ripití bes tras bes.

Ora mainta a habri Tio Moses a kòrda riba John Bentley, un eks-bandido. El a bai strèt na Diamond Grove i a haña e hòMBER.

“Si bo haña mi Mary i su yunan, mi ta duna bo 40 aker di mi mihó mondi di palu,” el a primít Bentley.

“Pero mi no tin niun manera pa sigui nan,” Bentley a argumentá.

“Mi ta duna bo mi mihó kabai di kareda, Pacer, pa bo kore riba dje. Solamente haña Mary pa mi,” Carver a roga.

“Ta bon, mi ta hasi mi bèst,” e hòMBER a bai di akuerdo.

Esaki tabata e siman promé ku Pasku, pero no tabatin niun preparashon pa Pasku e aña ei den e kas di Carver. Ni Tanta Susan ni Tio Moses tabatin kurason pa Pasku. Carver tabata bon zundra su mes ku e tabata un bobo. El a duna un eks-bandido su mihó kabai ku ta bal \$300 pa e bai buska Mary! Klaro nunca mas e ta bai trese e mucha muhé. Pacer tabata un bon kabai di hopi balor, pero e tabata nada kompará ku Mary, Melissa, i e beibi chikí malu ei, George. Esei tabata un siman hopi hopi tristu i un Pasku hopi hopi tristu ku solamente Jim chikí einan pa konsolá nan. Nan lo no mira restu di nan famia chikí mas? Kada bes ku nan pensa riba esei Tanta Susan ta kuminsá yora, i Tio Moses tin ku supla su nanishi varios biaha.



**Wak si bo por haña e 10 embahadornan
ehemplar aki den e pùzel.**



| | | | | | | | | | | |
|---|---|---|---|---|---|---|---|---|---|---|
| A | U | R | P | A | U | L | G | O | C | N |
| C | B | V | H | N | S | C | W | V | O | X |
| N | E | R | B | C | E | Z | X | M | N | T |
| X | I | B | A | U | F | S | O | M | I | D |
| G | E | D | S | H | E | L | Y | Q | I | P |
| N | B | O | T | S | A | W | D | V | A | S |
| D | J | T | I | S | C | M | A | T | H | A |
| T | N | O | E | E | H | D | Z | Z | N | U |
| C | N | V | C | O | Q | Y | U | F | I | O |
| L | I | A | U | K | H | J | H | O | S | E |

ABRAHAM
DAVID
ENOK
HOSE
JOSUE
JUAN
MOISES
NOE
SALOMON
SAULO



JOZEF, EMBAHADOR HÓBEN



PABIEN!

YUNAN DI PASTOR

2 yanüari 2021
Z'HANNAH KOOTS
(Bibando na Bonaire)

28 febrüari 2021
LUIS ALFÉREZ JR.
(Bibando na Merka)

8 mart 2021
GENTHLE FRANCISCA
(Bibando na Hulanda)

15 mart 2021
**SHURIMAIKA CARRERA
JANZEN** (Curaçao)

16 mart 2021
CLYFTON GREP
(Bibando na Hulanda)

16 mart 2021
LUCAS FRANCIS ASHBY
(Bibando na Aruba)

20 mart 2021
EACHER ANGILA HART
(Bibando na Costa Rica)

22 mart 2021
SANTIAGO NAVARRO
(Bibando na Aruba)

2 april 2021
**DULCÉ CONSUELO
ALFÉREZ** (Curaçao)

7 april 2021
TRIANA CABRERA
(Bibando na Curaçao)

9 april 2021
FERNON KWIDAMA JR.
(Bibando na Curaçao)

25 april 2021
ADINNE LABASTI
(Bibando na Hulanda)

26 mei 2021
JEHEZEBEL BRUNO
(Bibando na Curaçao)

13 yüni 2021
SHERMELIN WILLEMS
(Bibando na Hulanda)

18 yüni 2021
GENEVIEVE GREP
(Bibando na Hulanda)

21 yüni 2021
DONOVAN FRANCISCA
(Bibando na Hulanda)

23 yüni 2021
OWEN CABRERA
(Bibando na Curaçao)

26 yüni 2021
MONCHERIE MANUELA
(Bibando na Hulanda)






KOMPARTÍ BO IDEA!!!



- Tin algu bo tin gana di mira den e revista?
- Sigiente revista ta bai papia di BÒNS-BIN-BÈK.
- Bo tin artíkulo, un historia, un pùzel, un plachi pa klùr, un obra di man, ets. Traha riba dje i mand' é pa nos!



Bo por tuma kontakto ku nos na:

madushia@hotmail.com





*“Hesus a bira grandi i a krese tambe den
sabiduria; E tabata bon mirá tantu
serka Dios komo serka hende.”*
(Lukas 2:52)